

Atham woThimiththaoc 1

Atham wocittokit ammakka oPoluc pokurrinet oThimiththaoc

Lon lonothon

OThimiththaoc pokat purnantocokot lon loleccuo. Onnan poThimiththaoc pokat ponoul woLouth ana othan pokat pakonnoka ponoul woLouth. Kwokat cik akwommakot oPoluc akin onggene lon iloporot loIeccuo oMiccie. OThimiththaoc pokat ere ukul woPoluc. OThimiththaoc pothakkakathe pul ipittarot oPoluc ire ngung ngoKapik.

OPoluc pothiathe oThimiththaoc noka'ran kApuccuc akwothittarot ul iocckothe lon nomikit than. Kwi'rethe itti kwi'ret ul aco'ro nti ithongkene lon ilakonnoco'rot cik. Kwokenekathok ul iekkot nan itti waka ul ionu lon ikkun loul iocckothe lon loleccuo ana ul iittarot ul iocckothe lon loleccuo ana tat akka aul iocckothe lon loleccuo ikkoik. Ana kwi'rethe oThimiththaoc itti kwaka pul ipoporot tat poleccuo oMiccie.

Lon ilaik iatham

1. Thomicco (1.1–2)
2. Lon loul ittittik ana tha'rane Kapik nga'rama (1.3–3.16)
3. Lon lore ngoThimiththaoc (4.1–6.21)

¹ Oun oPoluc pul pothothilettat poMiccie oleccuo, ipothilethe mpu'ran poKapik ika'ret ton ana oleccuo oMiccie potho'rikot thonnon. ² Mpakurrinung oThimiththaoc oung ukul win icaricat akka orit aththe'ra thocckothe lon loleccuo nomikit. Athoporot ana thiak ana thomicco thoKapik oNgappa ana oMiccie oleccuo Ili wonnon oka naung.

Nokorronno okkwine ul iangkene ngkarra unu ncik

³ Mpi'rethung itti ngkwikkoik icarak coman cApuc-cuc ammakka mpi'rethung ampokat aneo noththok po-Makthonia. I'rethe ul iangkene ngkarra lon lonthomat itti akin oco'ro nti ithongkene thokarra. ⁴ I'rethekin itti akin oco'ro nti itharttot lon lotheret 'ran wothiki akka lon len lereket thopllarot ana lakannittarot lon ila Kapik konekketheik itti laccokittat nomik̄it. ⁵ Lon elli ila mpi'rethung lonthoththomat lonu lon lung itti ngkwangkene ul itti wangerot tat mm̄ik̄it mupupure ana lon ilao noucce iloporot ana thoccokot lon loleccuo nocik̄it ĩcat. ⁶ Ul iangkene ngkarra wocottakot nti ilon len akin opakkinthet lon ilella lon cik. ⁷ Okin thinnikot itti okin thaka ul iangkene lon lothonce'ret lon cik anaruk okin thomma manna ilakin thaik theret ana ilakin thaik thapakkukket tit.

⁸ Oron thina itti lon lothonce'ret cik loKapik loporot amma pul porekot ngngin ammakka Kapik kongothe. ⁹ Oron thina cakuruk itti lon lothonce'ret lon cik lokat lakannokkattanthet ul iakkot lon ila Kapik kongothe anaruk lokkattanthet ul iomma lon iakannoc̄ikot lon ana iak̄itto lon iloporot ana i'rat lon loKapik, ana ionu lon ilokithak, iakannoka wupupure ana iakatha itti lon lella ilupupure ana ieret lon ilokithak noKapik. Lon lothonce'ret lon cik lokkattanthet ul iangwo oththangon ana onangon ana ul iangwaro w'rek, ¹⁰ ana ul ia'ro nul iari ittat, ana ul iomura ia'ro nnul iomura, ana ul iakette pangken ana ul wokarra ana iakkwe mio ngkarra, ana lon l'rek ilakannomakot thongkene ithaik ĩcat thoKapik. ¹¹ Thongkene enthi thaat nnolon iloporot loleccuo ilethi-ettat, ilaat noKapik iekkkot nan itti kamerekettat ana kwethin itti anothongkene ul w'rek.

Thoporot thoKapik thaine oPoluc

¹² Mpopiranet oMiccie oIeccuo noka Ili wonnon, ook ipethin pu'ran ana ipokatharin itti mpekkot nan ana ook ipakkarothin ire ngung ngoKapik. ¹³ Ana manna mpokat anocungko oIeccuo ana occokiet ul thiak ioccoothe lon lung nomikit. Anaruk Kapik kipot thiak thin akka mpappakannocokot lon lung ana mpappommat lon ila mpokat cik anokkot. ¹⁴ Thoporot thoili wonnon thettathin nuthuk thoppot ana thocokot lon lung nocikit ana thongat tholeccuo oMiccie. ¹⁵ Lon elli ili'rettat laik icat ana lonu itti laccokittat papenang itti, "oMiccie oIeccuo paat nocapu ncik appik itti akwatho'ret ul wolon ilokithak." Ana oun akkokithak kannan ntiakin. ¹⁶ Anaruk Kapik kipot thiak thin, akwokene itti oMiccie oIeccuo po'rikothin itta'rene oun ipokithak kannan ana kwothikkierin pul ipa ul oneko lon nan iathocokot lon lung nomikit, akin iot thikkoik thothupthuput. ¹⁷ Ntrun opirane Ili Kapik noka ana ethok thirik akka ook Kapik kothupthuput ana kakannio ana ikakinnimmako ook Kapik kulukku ikaron othiane cik llon elli appik thupthuput. Amin.

¹⁸ Ukul win, oThimiththaoc, mpethung lon elli ila ul ierente lon loKapik werentethung ngngin, othakka itti amakot ana aina akka angkene lon loKapik. ¹⁹ O'rumi nolon lothocokot lon loIeccuo nocikit ana ella lon noucce ilokithak akka opilingon th'rat lon len ana okin thopa'ranthet lon loIeccuo cik nomikit. ²⁰ Ana okin the'ra nti iul wen oIminauic ana Alekenthaler mpethet kin pul pothopulut ana okin thonu itti okin thakannokattakot akin oul ioccoothe lon loIeccuo nomikit, menik akin ina itti okin thaco'ro nti ilon ilakin ocungkwo Kapik ngngin ilokithak.

2

Tat akka una'rane Kapik nga'rama

¹ Mpi'ret non, onon appik lon ilonu itti laka cittokit nanon ithoccoke lon loleccuo, na'rane ul nga'rama ana ipittinthe ul appik Kapik lon ilakin thongothe ana anon oka thopirane Kapik noka nakin. ² Na'rane ul nga'rama ammakka nili ana ul appik ionu ngili inyaun othakka itti aron ikkoik thikkoik thoporot ithupupure itha Kapik kongothe. ³ Elli loporot ana lapirie Kapik noka kotho'rettot thonnon. ⁴ Kwongothe itti ul appik wa'rettat ana ina lon ilaik icat. ⁵ Akka Kapik kaik kulukku ana pul paik pulukku ipi'rikot ton tothun ngKapik ook oMiccie oIeccuo. ⁶ Ook iponat ka kung itti akwio othakka itti aul iponyi appik oka nuthuk nti ilon ilokithak. Kwokkothe lon elli noca'ri ica Kapik kongothe othakka itti akwokene ul itti Kapik kongothe itti ka'ret kin. ⁷ Ilen akka Kapik kakkarorin ana kothiothin ammakka pul pothothilettat poIeccuo oMiccie itti anongkene ul iakannoka ul wolouth itti akin occokot lon loIeccuo nomikit ana ina lon ilaik icat. Mpaik pakannere karra, mpaik pere lon ilaik icat.

⁸ Mpongothe itti amma ul ioccoke lon loIeccuo wa'rantakotho imakkren iomura itti wa'ra nga'rama wonu itti wakkot akin thella lon cik ilokithak ammakka thuaka ana thopllarot. ⁹ Ana mpongothe cakuruk itti ul iari wako eret iakorranno ul athianekin cik ana iekkot nokamuthe. Akin okorranno occot kit na'rupu iongakothe kannan ammakka thokkot thire nuwan ana ako thaap ana muccu ana eret ionu cekerek cirik. ¹⁰ Lekkot nan itti ul iari iongothe Kapik wonu itti wakkintet ul lon appik iloporot. ¹¹ Ul iari wonu itti waccikot thongkene amma ul ioccoke lon loIeccuo wa'rantakotho angkoik ana othiaik. ¹² Mpakannockikintet ul iari itti wangkene ana orekie ul iomura llon len, anaruk wonu itti wangkoik. ¹³ Akka pul ipocura ipocot k'ran itti Atham akkockattathe cittokit nopul ipopari ipocot k'ran

itti Aua. ¹⁴ Ana Atham akkakanammikkakot, anaruk pul ipopari ipoccot k'ran itti Aua akkammikkakothē ana pothakkakathe pul iparrothe lon cik loKapik. ¹⁵ Anaruk pul ipopari pantokwono nyukul nthokinya pa'rettat amma po'rungkothe ithoccot lon loKapik nocikīt ana ithongarot ana pupupure ana oka pinaik nti ica.

3

Pul iponu lon ikkun

¹ Lon elli laik icat, amma okwi ipongothe itti kwathakka pul iponu lon ikkun loul ioccothe lon loIeccuo lon len loporot. ² Pul iponu lon ikkun loul ioccothe lon loIeccuo ponu itti paka pul ipella thorukwettat cik ana apona pari pulukku ana oka po'rumot noka kung ana oka pinaik nti ica ana oka pothiakinet cik ana oka pongothe itti ul wainok appik ana akwina ongkene ul. ³ Ana okorronno ikko ngapak ngoppot ana oka pul ipakorronno ipot p'ran cik ana tha'retto anaruk apoka poporot poku'ri ana okorronno ona no're nakucci. ⁴ Kwonu itti kwina lon lopeon kicce ana nyukul nyung occikothok papenang. ⁵ Akka amma pul pomma othettot lon cik loruan tung papenang kwina othettot lon cik loul iccothe lon loIeccuo taththa? ⁶ Kwonu itti kwakannoka ipurnoccot lon loKapik akka kwathipot ka kung kathoura ammakka pul pothopulut pokkothe, aKapik occokiekat thiak. ⁷ Kwonu itti kwaka pul ipa ul othianeik iakannoccot lon loKapik, othakka itti akwokorronno occirako ngngin tokit koul ana akwokorronno i'riththat ilo'rak lopul pothopulut.

Ul ittarot ul ioccothe lon loIeccuo

⁸ Ul ittarot ul ioccothe lon loIeccuo wonu cakuruk itti waka ul ia ul othianeik ana iere lon ilaik icat ana okorronno ikko ngapak ngoppot ona no're nakucci. ⁹ Okin thonu itti okin tha'rumo nothoccot lon loIeccuo

nomik̄it ana nthoporot noucce. ¹⁰ Okin thonu itti okin thenekketta cittok̄it amma okin akkella lon cik ilokithak akin othakka ul ittarot ul iocckothe lon loKapik. ¹¹ Ana ul iari wonu itti waka menik cakuruk ana oka wothiakineik ana wakanneret ul llon ilokithak. Ana tho'rumot noka ken appik ana oka ul ia ul onekket mik̄it nan ana ethet lon. ¹² Ul ittarot ul wonu itti wana pari pulukku ana ina lon lonyukul ana lon loruan ten. ¹³ Okin ithorekot papenang, okin thaka thopirakinet noka tok̄it koul ana okin theret thocckot lon nomik̄it then loIeccuo oMiccie tok̄it koul.

Kathar ika ul ikkoik ngngin

¹⁴ Mpaik pakathacceik itti mpainung noma'ri motte ana mpaik pakurrinung lon elli othakka itti, ¹⁵ amma mpoccot cik aina itti ul wikkoik tat okin ithocckothe lon loIeccuo. Oron ul woKapik ikaik icat, oron tha'rumo nolon ilaik icat ere millang imace'ret man tan. ¹⁶ Mpi'ret non itti kumitta ika Kapik kokenetton krīk kannan. Kokenetton tat akka oron ikkoik ammakka Kapik kongothe. Kummothe ncik ngka kopul iponyi ana Kanang koKapik ikupupure kokenet itti kwaik pakkot lon iloco'rotheik ana u'rupa wotho'hi'lettat woKapik ilon len wimmat oIeccuo. Ana ul werekanthet ul lon iloporot loIeccuo ncik appik ana ul wocckothe lon lung nomik̄it. Ana kwonekittathe tothi'rot nthirik.

4

Ul iangkene ngkarra

¹ Kanang ikupupure koKapik ki'ret papenang itti noma'ri imanthen opilingon thaththe nolon lothocckot lon loIeccuo nomik̄it akin omakot u'rupa iokithak wokarra ana lon ila u'rupa iokithak wongkenet. ² Thongkene ammakka enthi thao noul ionu karra kannan ana mik̄it men makorronno okenekin lon papenang ere okin thok'rot

mpaponte ipippa. ³ Ul wen wamet ul itti wakannipo ana oce'rekin nothu'rit th'rek itha Kapik kokkothe. Anaruk Kapik kokkothe thu'rit enthi itti thartta ana opirane Kapik noka nan, okin ithoccokothe lon loIeccuo nomikït ana ithina lon ilaik ïcat. ⁴ Akka a'rupu ia Kapik kokkothe appik woporot ana papu pella ip'rako amma poccurat nthopirane Kapik noka. ⁵ Akka lon loKapik ana nga'rama ngothopirane Kapik noka ngathikkie a'rupu wupupure itti wartta.

Pul ipareko ipoporot poIeccuo oMiccie

⁶ Amma ngkwi'rethe opang ponnongon ithoccokothe lon loIeccuo lon elli ngkwaka pul ipareko ipoporot poIeccuo oMiccie ipupothakothe ilon ilaik ïcat lothoccokot lon loKapik nocikït ana lothongkene ithoporot itha ngkwomakothe. ⁷ kirrnni occikot lon lokerung lokarra ilakannoka loKapik ana ilella lon cik anaruk okuccekiethe ka kang cik athakka pul polon loKapik. ⁸ Akka li'rettat itti, “Thokucet ka cik thonu thoporot tit thotte thathikkie thikkoik thoporot.” Anaruk thokuccekot cik llon loKapik thoporot llon appik, nothikkoik inenni ana nothikkoik ithanthan. ⁹ Lon elli laik ïcat, lonu itti laccikakot. ¹⁰ Ana ilen akka oron oreko ana okinya kicce akka oron thonekkethe kit noKapik ikaik ïcat, ook potho'ret ul appik ana ul anganna iocckothe lon lung.

¹¹ I'rethekin angkenekat lon elli. ¹² kirrnni okorronnokin akin okathang ere ngkwotte othakkanekin pul ipakin oneko lon nan, okin ithoccokothe lon loIeccuo nomikït, nthere thang ana nthikkoik thang, nthongat thang ana nthoccokot lon loKapik nocikït thang ana nthupupure thang. ¹³ Okkothe lon elli puccuk anokkaprt-tako ntan, akkakarinet ul lon latham woKapik ana erenekin lon latham ana angkenekat kin. ¹⁴ Kirrnni opa'rine thethïetta cik itha Kapik kethung noca'ri ica

ul wothernte lon loKapik werethung ngngin ana ca'ri ica ul ittittik ioccokothe lon loIeccuo wonekethe nyaun naung. ¹⁵ Oreki llon elli, ncikit cang appik othakka itti aul immang appik itti ngkwaik pakkot lon iloporot. ¹⁶ Okatha akka aikkoik ana tat akka angkene. Oreki llon len akka amma ngkworekot llon len, ngkwa'ret ka kang ana ul iaik waccikothung.

5

Ngkwittarot ul ioccokothe lon loIeccuo nomikit taththa?

¹ Kirrni othirriet pul cik ipukkwat anaruk erenok nthothiaik ana okkinthok lon ere oththe pang. Okkinthet u'rit lon ere opangkangon. ² Okkinthet ul iari iukkwat lon ere onnen ana ul iari ionan ere opangkangon ithari ella lon tit ilokithak.

³ Nittarot muruma imari ima allen thillet nan imokwentakot thellek. ⁴ Anaruk amma curuma conu nyukul manna opikion, opikion then thonu itti okin thareko llon loKapik cittokit itti okin tha'rumo naththangon ana onangon akin okkene oththangon ana opikion ilakin thokkinthet kin. Akka ittina lon len akkapirie Kapik noka. ⁵ Curuma icella a'rupu cik ana icaik cokwentakot pellek ca'rikot Kapik ana a'ra nga'rama itti akittarothok appinappin. ⁶ Anaruk curuma icanyarakot ana okwancot ilapiriek noka cikkoik tokit koKapik ere ciot ana ere cella cik, antoka manna itti cakinnio. ⁷ I'rethe ul lon elli appik ioccokothe lon loIeccuo, aul ella lon cik ilakin orukwettat ngngin. ⁸ Amma okkwi ipakanno'rumo noku'ri kung nthu'rit ana anganna tuan thanung kwopa'rinet thocokot lon loIeccuo cik, kwaka pokithak kannan manna noul iakannocokot lon loIeccuo nomikit.

⁹ 'Ran womuruma imari wonu itti wakannoka ii'ran womuruma ima ul ioccokothe lon loIeccuo ittarot akka monu itti mana luput arrial w'rapuruk (60) ana cacconat

olle pulukku. ¹⁰ Curuma cen conu itti cinako nan nul appik ngre ioporot ammakka itti thupotho nyukul nyung papenang ana ikkie ul cik ana omene ul woKapik tacok ana ittarot ul iaik waccokot thiak ana ongat itti careko ngre ioporot ncik appik.

¹¹ Anaruk 'ran muruma imarran wonu itti wakanoka ii'ran womuruma imittarakot. Akka amma okin thokwarikothe ul iomura akin omekat itti okin thitta akin opa'ranthet lon longre ngoIeccuo cik. ¹² Ittina ul wa'retto nakin akka okin tharrothe lon cik ilakin thaththonekketheik itti okin thakkot. ¹³ Cakuruk okin thipo ngore ana okin thanyarot cik nuthuk ikaman koul, akin i'rikikko ilon loul akin eret kin llon ilakin thiraththanneret kin ngngin. ¹⁴ Ittina mperene muruma imarran itti amitta amokwono nyukul amokathakat lon lokaman ken othakka itti aul i'rat lon lonnon okorronno iot kathar ikakin ocungkworon ngngin. ¹⁵ Muruma m'rek moththet nolon loKapik ana momakothe pul pothopulut. ¹⁶ Amma pul p'rek ipopari ipocokothel lon loIeccuo ponu muruma tuan, ponu itti pittarot kin ngka kung annoka ul iocokothel lon loIeccuo othakka itti aul iocokothel lon loIeccuo okatha lon loul iaik muruma thellek aittarakot.

¹⁷ Ul ittittik woul ionu lon ikkun loul iocokothel lon loIeccuo wonu itti wathiakineik kannan ana anggana okin ithere lon loKapik ana ongekene. ¹⁸ Akka atham woKapik wi'ret itti, "kirrnni i'riko thon thoura itti ngakanno'rkoik amma ngkwaik pacukkwariet mil cik othakka itti amopura." Ana atham woKapik wi'ret cakuruk itti, "Pul ipareko ponu itti pacco a'rupu nti ire." ¹⁹ kirrnni occikot thorukwet ithorukwettathe pul iponu lon ikkun loul iocokothel lon loIeccuo amma ul wella we'ra manna w'rapuruk wokat cik itti wimmat lon len. ²⁰ Ngkwonu itti

5:18 5.18 Thethinia 25.4
5.19 Thethinia 17.6; 19.15

5:18 5.18 Maththa 10.10; Lukka 10.7

5:19

ngkwa'retto noul iakkot lon ilokithak tokit koul othakka itti apilingon th'rek ipo n're noKapik.

²¹ Mpethung lon elli ikkun tokit koKapik ana koleccuo oMiccie ana kou'rupa wothothilettat woKapik iakkarakot. Mpi'rethung itti ngkwa'rumo nolon elli akorronno icat nopul p'rek amma ance'ret lon cik. ²² Nokorronno i'rikitto lon itti nthathikkie pul p'rek pul ipana lon loul ikkun iocokothe lon loleccuo cokocokot akka amma onon thokkothe cokocokot ana kwokat pokithak ana nthaka ilon ilokithak. Angwothe ka kang kupupure nti ilon ilokithak.

²³ kirnni ikko ng'ri ngulluk, ikkinet carak ngapak ngotte aka kang oka koporot akka ngkwanganga appinappin.

²⁴ Ina nan itti lon ilokithak lopilingon iaul wina nan appik ana wakannoce'ret lon cik anaruk lon loul w'rek lakanninako nan ana linako nan ca'ri c'rek. ²⁵ Ammakka menik ul wina nan appik tat akka opilingon thokkothe ngre ngoporot anaruk opilingon thaik ithokkothe ngre ngoporot ana okin thakanninako nan anaruk okin thinako nan ca'ri c'rek.

6

¹ Ul appik iocokothe lon loleccuo ia iak wonu itti wathiane opingon cik ana okkinthet kin lon papenang appinappin othakka itti ak'ran koKapik ana thongkene thonnon okorronno occirako ngngin. ² Ana iak ionu opingon thakin thocokothe lon loleccuo nomikit okin aththungon thonu itti okin thakarranno ipo kit nore ngopingon akka okin thothakkat thokwontat. Anaruk okin thonu itti okin tharekinakin kannan akka okin thaik thittarat opingon ithocokothe lon loleccuo nomikit ana ithongakothe. Ngkwonu itti ngkwangkene ana erene ul lon elli.

Thongkene ngkarra ana tha'rthan ithaik icat

³ Okkwi ipongkenet thongkene ithakannoco'rot cik ana 'ra occikot lon iloporot lolli oleccuo oMiccie ana thongkene ithakeneron itti oron thikkoik tat, ⁴ kwaik pipot kathoura noka kung nuthuk ana kwomma lon l'rek. Kwaccot kit nolon nocapu tulluk ilana tha'retto ana thothatto ana elli appik lanekarot nothonyira ana thopettaro tit ana thokwarttikot pul ilon ilokithak ana okarranno onekket cikit noul. ⁵ Ul ammakka enni wa'rettaro nan tulluk ana ma men monu lon lulluk ilokithak ana okin th'rat lon ilaik icat okin thakatha lon loKapik ere kathar ikakin ipo tha'rthan ngngin. ⁶ Anaruk thoka pa'rthan thonu itti thomakot lon loKapik ana oka popirat noka na'rupu ia ngkwonu. ⁷ Akka oron thakannona pap'rek nocapu ncik ca'ri icaron thokwontat nan ana oron thakannoneko pap'rek ca'ri icaron ille. ⁸ Anaruk amma oron thonu thu'rit ana eret wekkot. ⁹ Ana okkwion ithongothe itti okin thathakka a'rthan okin thapukkothe ilon moloko ana thongat ithietto ka kongo ana ila akitto ul kirrkkir. ¹⁰ Akka thongat thakucci thakorronno aul okkot lon lulluk ilokithak. Opilingon ithangkothe akucci thomakothe lon len ana okin thopa'ranthet thocokot lon loleccuo cik akin onakanthet ka ken thiak thoppot.

Kathar ikapirie Kapik noka

¹¹ Anaruk Thimiththaoc oung pul poKapik, kirrinni elli appik, ommakothe lon iloporot ana ngkathar ikapirie Kapik noka ana thocokot lon loleccuo nocikit ana thongat ana opo'rathan ana oka poporot lon. ¹² Opo'rathan nthocokot lon loleccuo nocikit thopo'rathan ithoporot aina akka aiot thikkoik thothupuththuput itha Kapik kakkarothung. Akka ca'ri ica ngkwerethe lon len ngkwerethe theret ithoporot tokit koul woppot. ¹³ Mpethung lon elli ikkun tokit koKapik ikethet a'rupu thikkoik appik

ana tokit koIeccuo oMiccie ipakannocukkwo nolon ilaik
 icat tokit koPilaththoc poPunththioc, ¹⁴ itti ngkwa'rumo
 nan ana a'runkwot pupure ella lon nan ilokithak puc-
 cuk aca'ri akkakat ica Ili wonnon oleccuo oMiccie ao
 nan. ¹⁵ Oleccuo panthan noca'ri icekkot nan, ica Kapik
 okeneron. Ook Kapik ikirik pellek. Ook Ili wonili ana
 Kapik konili. ¹⁶ Ook pellek ipaik thupuththuput ana ook
 ipikkoik ik'ran ikacco ika pul pella paeo nan ana pul
 pella pimmarok ana manna pul pella pimmak. Akwoka
 pothiakinet cik ana ona pu'run thupuththuput. Amin.

¹⁷ I'rethe ul iaa'rthan nocapu ncik appik enci akin
 okorronno ipot ka thoura ana okorronno onekket mikit
 men notha'rthan then ithurat cik accokkot anaruk akin
 onekket mikit noKapik, ikethet ton a'rupu appik nuthuk
 iaron opira noka ngngin. ¹⁸ I'rethe ul iaa'rthan itti akin
 okkot lon iloporot, akin oka thoporot kannan llon iloporot
 ana ikket ul a'rupu nuthuk iakin thonu. ¹⁹ Ittina okin
 thaik tha'rintinthe ka ken lon iloporot tothi'rot aloka ere
 millang mokaman ikoporot koca'ri icanthan, othakka itti
 akin ina akka akin iot thikkoik ithaik icaricat.

²⁰ Thimiththaoc, o'rumi nolon papenang ila ngkwocot
 itti ngkwangkene. Opa'rinet lon cik ilakannoka loKapik
 ana thopllarot llon itha ul ome itti thina cik anaruk
 lakannoka icat. ²¹ Opilingon thocokothe lon len ana okin
 thurekathe thocokot lon loIeccuo nomikit cik.

Athoporot thoKapik oka nanon appik.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243faecee